

御選語錄卷第二十

皋十

和碩雍親王圓明居士語錄

王一日聞成樓鐘聲問云什麼聲從者云是鐘聲王云我只道是鼓聲從者笑云何以鐘聲作鼓聲賺小奴王云你見撞鐘來那從者云雖然不見聽得是鐘聲王搖手云却是你賺我

王夜坐忽聞風起喚從者者應入王云風喚汝不答余喚汝即應何也從者無對王云風喚汝即去余喚汝不來何也從者又無對王云大門閉了不曾從者云尚未王云開開

有僧問童子持鑑意旨如何王云小兒伎倆云如何是大人作用王云訓他不持云王爺特尊貴生王云將謂你是小兒僧便

喝王云小兒形態畢露云切莫壓良爲賊王云公案現在云恁麼則王爺一狀領過也王云無奈被閻黎帶累云轉見不堪王云漆桶相逢傳爲諸方笑具

有僧問大海無波因甚觸風鼓浪王云只爲無心云本自清淨爲何遇緣生情王云只爲有意云如何修行王云有意處無心無心處有意云若然人天福報則不無衲僧門下尚欠一籌在王云試露消息看僧便喝王云龍頭蛇尾漢云王爺又作麼生王亦喝僧又喝王云果然通身鱗甲僧笑云收

開坐次侍從請示云古德徃徃有一字之答意旨如何王云汝等試問看 問如何是佛王云天 問如何是法王云地 問

如何是僧王云人 問如何是不是佛王云物 問如何是不是心王云佛 問如何是不是物王云心 問如何是萬法歸一王云開 問如何是一歸何處王云合 問如何是庭前栢樹子王云入 問如何是吹布毛意旨王云隨 問如何是蘇三勛意旨王云慈 問如何是未生前本來面目王云謹 問如何是趙州關王云穿 問如何是君王云仁 問如何是臣王云義 問如何是臣奉君王云禮 問如何是君就臣王云智 問如何是君臣道合王云信 問如何是透網金鱗王云苦 問如何是不與萬法為侶王云親 問如何是一口吸盡西江王云浸 問如何是函蓋乾坤王云怪 問如何是細入

卷十

二

微塵王云奇 問如何是古澗寒泉王云冷 問如何是奪境不奪人王云狂 問如何是奪人不奪境王云癡 問如何是人境俱奪王云睡 問如何是人境俱不奪王云醒 問如何是第一句王云下 問如何是第二句王云中 問如何是第三句王云上 問如何是即心即佛王云誑 問如何是非心非佛王云誕 問如何是若能轉物即同如來王云急 問如何是金剛王寶劍王云狠 問如何是踞地獅子王云毒 問如何是探竿影草王云戲 問如何是一喝不作一喝用王云屈 問如何是到岸不須舟王云留 問如何是生無所住心王云如 問如何是因果報應王云確 問如何是眼耳鼻舌

卷十

三

身意王云六 問如何是色聲香味觸法
王云一 問如何是北斗裏藏身王云顯
問如何是一領布衫重七觔王云露
問如何是大海無魚王云妄 問如何是
大富無糧王云詐 問如何是大悟無道
王云賊 問如何是一路涅槃門王云然
問如何是香巖上樹意旨王云墮 問
如何是神前蠟燭臺王云真 問如何是
殿閣生微涼意旨王云隱 問如何是三
玄三要王云九 問如何是我宗無語句
王云實 問如何是空谷傳聲王云應
問如何是看山不是山王云明 問如何
是看水還是水王云瞎 問如何是狗子
無佛性王云釣 問如何是脚跟點地王
云退 問如何是百草頭邊祖師意王云

賺 問如何是塵塵剝剝露全身王云徹
問如何是飯羅邊餓死人王云愚 問
如何是不涉功勳王云誠 問如何是無
爲而治王云平 問如何是念佛往生王
云必 問如何是六波羅密行王云種
問如何是淨裸裸赤灑灑王云累 問如
何是不染一塵王云濁 問如何是雲門
一棒王云空 問如何是主王云陞 問
如何是賓王云降 問如何是主中主王
云多 問如何是賓中賓王云重 問如
何是賓主互換王云錯 問如何是一喝
分賓主王云斫 問如何是芥子納須彌
王云易 問如何是須彌納芥子王云難
問如何是無舌人解語王云辯 問如
何是啐啄同時王云中 問如何是大人

相王云沙 問如何是無量法門王云雜
問如何是戒定慧王云鼎 問如何是
出家人行履王云俗 問如何是在家人
修行王云僧 問如何是驢胎馬腹去王
云償 問如何是別峰相見王云會 問
如何是塵說刹說熾然說王云鳴 問如
何是一念萬年王云夢 問如何是清淨
法身王云無 問如何是萬億化身王云
有 問如何是圓滿報身王云串 問如
何是途中不離家舍家舍不離途中王云
恰 問如何是照王云妖 問如何是用
王云精 問如何是照用同時王云捏
問如何是照用不同時王云裂 問如何
是豎窮三際橫遍十方王云普 問如何
是普度衆生王云引 問如何是太平世

卷十

五

界王云和 問如何是西來大意王云月
乃云一字之意雖然如是一字尚然多設
何況餘言若能會得一字方可涉獵餘文
若不能領一字之旨便熟誦三藏十二部
博通經傳子史皆如以明珠作魚目徒增
茫茫業識耳有志達士但悉心究了此一
字千經萬卷即在其中矣決不相賺
有僧問一人發真歸元十方虛空悉皆消
殞意旨如何王云因他有因他濁云晴空
如何言得有濁王云一闡提會中許上座
添一位
一道士問云釋道之教是同是別王云同
則總同別則總別云如何是同處王云渴
飲饑飡云別處如何王云黃冠僧帽衲衣
羽裳士云貧道所問三藏洞文之教意王

云仙佛設教之意豈出衣冠飲食也士有省禮謝云多感布施無上金丹王笑云雖然還須煅煉九轉方得成熟

春日林中同僧坐次聞黃鸝聲王問云此鳥弄艷詞演唱般若功也過也一僧云將謂王爺唱曲王愕然云大德幾時得者箇消息云豈不聞鴉鳴鵲噪盡演摩訶王笑云依稀似曲纔堪聽又被風吹別調中

有僧問興化四方八面來時打中間底意旨如何王云太喫力生云王爺作麼生王云割肉喂鷹去云興化又道遇卒風暴雨向古廟裏躲過你王云轉見不堪云王爺又作麼生王云幫他括幫他下僧禮謝云恁麼則興化未徹在王云盜名欺世虛譽惑人者如蔴似粟豈止興化一人而已所

六

六

以要具叅方眼睛不然不被耳朵瞞者罕矣

一護衛問北斗裏藏身意旨如何王云因慈悲故有落草之談云如三脚驢子弄蹄行八角磨盤空裏走是何言也王云因落草故有慈悲之談云佛經爲何不見有此說話王笑云因佛不慈悲不落草所以不言及此

僧問不與萬法爲侶者什麼人王云即內不即外離二不離一云恁麼則是法住法位世間相常住也王云日落西山月昇東海云可作得中心樹子也未王云還見四方八面麼云作麼生行履即得王云泥牛奔入海底羚羊掛角松梢

僧問萬里不掛片雲時如何王云萬里不

挂片雲云爲何又道青天也須喫棒王云
萬里自不掛片雲與青天有何交涉云恁
麼則恁麼去也王云青天也須喫棒云前
言何在王云因有前言乃舉後語云莫非
末後句也王云將什麼喚作最初句僧禮
謝王云無始有終的衲子三十年後覓一
個半個也難得

一日賞花次王云人欲脩佛極易之事不
必千經萬卷佛言若能轉物即同如來只
此一句即可成佛世尊乃大慈悲父如語
真語實語者有一侍從云衆生如何被物
轉王云賞花從者云如來如何轉物王云
花賞者云衆生隨波逐浪如來如何行履
王云鈍置漢浪逐波隨也道不出者云若
如此極易也喫飯但言飯喫睡覺但言覺

睡即可謂同如來耶王喝一喝云是你聽
見我喝是我喝見你聽者云自然是奴才
聽見主喝王笑云真正聽喝的奴才
是日大風有僧問曰風鼓塵也塵鼓風也
王云好好一個圓球被汝擘作兩半云大
有人未肯點首在王云一口吸盡西江堪
作什麼僧於言下大省王嘆云雖然滄海
不覺濶易青天不覺空難
有僧問靜喧語默如何通不犯去王云飲
啖珍饈不知百味云恁麼則枯木寒灰去
也王云即此用始得云恁麼則鑊湯爐炭
去也王云離此用始得云如何行履王云
耳觀目聽去云向上還有事也無王云有
云乞請指示王云耳亦觀不著目也聽不
著

中秋月初八上弦夜對月閑坐王云好月不圓不缺好個時節侍從無語王云從前弘覺恣禪師舉仰山玩月次山指月問者個月尖時圓相向甚麼處去圓時尖相又向甚麼處去石室云尖時圓相隱圓時尖相在雲門別云尖時圓相在圓時無尖相道吾云尖時亦不尖圓時亦不圓時師會下有一僧云逢尖即尖遇圓即圓師自別云尖時圓相尖圓時尖相圓弘覺大似將張三作李四者僧韓盧逐塊道吾躲跟石室龍頭蛇尾雲門猶較些子雖然如是如是未免有者在圓明即不然是尖不見尖是圓不見圓恁麼說話還有檢點者麼智者見之謂之智仁者見之謂之仁不是與人難共處大都緇素要分明

舉十

八

一日同僧齋次王舉昔日黃龍心與夏公立譚擊論會情與無情共一體時有狗子臥香桌下龍拈尺擊狗子又擊香桌云狗子有情則去香桌無情自住情與無情如何成一體公立不能對靈岳慍云要會情與無情共一體鈍殺有情狗子碎却無情香桌將來與他一團束縛拋向大洋海自然灑灑落落弘覺恣云何如有情狗子仍教他守夜無情香桌且留支用要會情與無情共一體但將擬議思量的與他一

舉十

九

刀兩段則十方空蕩蕩地自然常光見前喚甚有情無情與你為礙為緣據圓明看來二老俱涉功勳不免勉強作主非的實之論各為公立代一語看有云恁麼則兩重公案者王云一任雙叅有云分疎即不

堪者王云不分疎可堪那有云狗子不動
香桌走者王云各人且掃門前雪有云還
識香桌狗子麼者王云躲跟到那里去有
云香桌狗子一狀領過者王云闍黎也少
不得在裏許衆云王爺却如何代王云狗
子擊則去香桌擊不動此正有情無情共
一體處

一日同僧坐次王文殊從無住本立一
切法圓明從一切法立無住本問諸仁者
同異在什麼處有云翻手雲覆手雨者有
云今日瞻仰者有云黃河九曲水出崑崙
者有云著珍服掛垢衣須是王爺始得者
有云王爺陞堂文殊放恭者王云俱未在
文殊先天而天弗違圓明後天而奉天時
且道圓明與文殊是同是異有云昔日文

殊今朝王爺者有云文殊途中家舍王爺
家舍途中者有云同則總同異則總異者
有云文殊不識王爺王爺不識文殊者有
云喚王爺作文殊亦得喚文殊作王爺亦
得者王云俱非圓明境界文殊是圓明圓
明不是文殊

開坐次衆護衛侍側有一侍從問云如何
是奴才的真我王自指云是我從者云小
人豈敢當王云實話者云若然王爺將何
爲我王云是你者云如何是主僕的你我
王復指一人云是他衆皆不解王云佛法
平等無人我貴賤是非之分者曰若然將
子孫喚祖父可乎王云善哉此問一切衆
生皆因執幻我故所以孝慈亦皆成幻孝
幻慈執有我故所以有孝有不孝有慈有

不慈菩薩因無我故上與諸佛同一慈力
下與衆生同一悲仰孝敬祖父則同悲仰
慈愛子孫則同慈力如此則只有孝慈而
覓不孝不慈了不可得是則名爲真孝真
慈即此孝慈便是真我推而言之萬事萬
理皆然華嚴經云以菩提心爲家以如理
修行爲家法古德云佛法不壞世間相如
井底之蛙坐井窺天之凡愚謗釋門如楊
朱墨翟之邪見外道謂之無父無君者何
異仰面唾雲自取辱耳此皆未見顏色之
瞽論汝等切莫惑此邪說吾儒聖人切言
世間之法而罕言命與仁者非棄出世間
法也恐凡愚着空見故也佛釋之切言出
世間法而罕言是與非者非棄世間法也
恐凡愚着有見故也釋教實有補於聖人

表十

十一

之明德新民克己復禮之教聖教實有補
於佛言之戒行功德因緣果報之教中外
二聖實互爲表裏化人度世之慈恩實無
同異聖佛合一之微旨非凡夫知識之所
能推口筆之所能示惟證乃知難可測者
須各努力參究余實違一貫之宗非強立
分別之論決不相賺
侍從一人問曰如何是無所住心王云明
來明住暗來暗住色來色住空來空住從
者云此有所住心也王云又道無所住者
云下愚實甚生疑王云將你的疑給我來
者云小人自己的疑如何與得王主王云
既如此我的不疑又何法與汝也者默然
王笑云叅
一從者問牛過窓樵頭角四蹄都過了爲

甚尾巴過不得王云你看見牛過窓來那云未曾王云且莫聽人愚弄云過去祖師豈有誑語王云自然祖師豈有誑語云王爺前言何在王云實話且莫聽人愚弄者茫然王笑云莫輕視人圓明也是箇不打誑語的小祖師

一從者問玄沙道聾聾啞啞人作麼生接倘遇此等人王爺便作麼生王云薰香接者云設復塞却鼻孔又如何王云與他服麻木藥喫者云恁麼則更毫無知識也奈何王云已爲汝接竟從者不解王云看來你較此病人却更覺難接

一從者問香巖道口啣樹枝手脚俱不攀踏有人問西來意答即喪身失命不答又辜負他來意却如何是好王云你設身在

樹上問樹下問者云設身樹上王云那來問的你道是好心是不好心者云有什麼好心王云似此不好心的人采他作麼雖然下樹始得安穩

熱河有僧問一塵入正受諸塵三昧起意旨如何王云我

皇巡狩中外歡迎云還登寶殿也不王云不是不登如同行在云四海五湖王化裏也王云清風明月綠水青山有什麼交涉云恁麼則同中不說異異裏不言同也王云分別即不得云如何操履王云大德道此去京城多少路僧禮謝王云不可將途中作家舍僧云又道家舍不離途中咏王云將謂上座作如是解

一侍從問透網金鱗以何爲食王云喫土

云學人不解王云逃坑落塹不喫土喫什麼復云透網金鱗以何爲命王云以火爲命云學人更不解王云避溺投火自然以火爲命從者默然王云解得無語不解無語云仍然不解王云好箇消息可惜只多了箇不解

幸一

十三

僧問如何是有一人盡力入不得王云鳶飛戾天云有一人盡力出不得王云魚躍於淵云二人相去多少王云上下察也僧問天不能蓋地不能載恒沙鬧市裏請王爺指出一箇來王云問他第二月作麼云如何是月王云到即不點云即恁麼去也王云保任保任一侍從問如何是佛祖的的法王云你問我答從者云王爺不曾答王云我不答

你不問者云若然則問與不問答與不答皆是的是的法也王云問與不問答與不答皆不是的法者云學人不會求王爺開示的的佛祖之法王笑云除此之外將何的的佛祖法與你說者默然王云向上一句又被你占了更沒得說也

有僧問一物不將來時如何王云貪官遭籍沒云萬物皆備於我却作麼生王云也是乞兒獲小利云兩途不取不捨如何行履王云清清着云清清與惺惺是同是別王云惺惺有不清清之時清清無不惺惺之理云向上還有事也無王云有云請王指示王云千峰勢到處萬派聲歸時云此時此處可通一消息否王云今日十五不可說俟到初一慢商量

有僧問一人門內出不得一人門外入不得事如何王云憑空築堵墻作麼僧云渠却出入得自由王云何苦走出走入僧云恁麼則皇風成一片何處覓封疆王云還我中心樹子來云祖父從來不出門王笑

來十

十四

云大好拆却牆僧作掌勢王云者便是牆僧一喝王云者便是門云請王出入看王云我王府內無如是奴僧無語王云伎倆應盡闍黎無過云到此王爺作麼生道王云代汝一語還我王府來僧稽首云果然作家雍親王王云幸不是知音

南來二僧參見方入堂王云二大德余一人認得一人不認得二僧云某某皆係初見尊駕王云圓明言的是前生僧云王爺莫非宿命通也王云非是圓明宿命通自

是闍黎未會前生話云未生前話如何王云一識一不識二僧欣笑作禮王云亦不可作兩說茶次王云一人喫茶一人茶喫云前三三後三三王云却不是者箇道理

有僧問我是有如何王云須待有現云我是空如何王云須待空現云向來葛藤如何安置王云如同有會云終非究竟王云用無燄冰火去云恁麼則洪爐一點雪也王云珍重僧大展禮云將此身心奉塵刹

來十

十五

何以仰報我王恩王云知恩即不得僧感泣禮謝云又是一重恩爭能不感湧王笑云瞎驢又恁麼去

栢林僧至府坐次問如何是庭前栢樹子王云你道栢林寺裏明日放堂明日打齋

一道者問太陽溢目萬里不掛片雲意旨如何王云汝但去人看

有儒士問三教之同異王云若論○以內三教實同一道不可泥於迹象涉於事爲而妄生分別也儒以修齊治平設教道以虛無清淨設教究其所以示人者不能外○者箇而釋教亦不捨離○者箇既不捨離即此○內而言則不謂之一貫不可也若以○之外周孔黃老之書未言及此能明此者惟有釋典耳下士愚盲小智見淺謂○以內尚不明了何暇究○以外不知○以內者倚○以外者而立若不明○以外則○以內無論不能頓地透脫即使到得盡處猶有者箇○在人但知拘滯生死不知窮其無生不死此一大關惟此一路

方透即以佛教而論如講演戒律何嘗不與宗爲一貫必須宗爲之統攝離宗則盡屬幻作宗乃第一義也然一亦不立方是佛旨即此觀彼自明三教分合之定論圓明寧甘汝等迂儒之謗斷不忍令衆生長溺苦海而不拯救指迷也士聞愕然諾諾而退

四月八日月下坐次有從者指月問云那

一半爲何不見王云理合如是

有儒士問如何是六般神用王云穴裏工十

十

人只須兩箇不兩箇

溪邊閒步一書生問如何得似碧潭光皎潔去王云減去目下一點

如三藏十二部無非敷演色即是空空即是色教外別傳歷代祖師提唱無非即心即佛一句汝但會色即是空空即是色色即是心心即是色佛即是心心即是佛佛即是空空即是佛能將此四句^②^③^④合成

一句承當一生叅學事畢

有道者問無邊身菩薩爲何不見世尊頂王云如文殊菩薩不能測如來智云文殊爲何不能測如來智王云如無邊身菩薩不見世尊頂云佛見無邊身菩薩頂否王云見則非佛不見亦非佛云佛測文殊智否王云若測非佛不測亦非佛道者有醒王云卸下道冠始得

侍從粧香次王云香烟如何得無香味去者云却請王爺道王以手掩鼻

五十一

十七

有僧問慧燈朗耀時如何王曰伸手不見掌云意旨如何王云一里火光王至栢林僧衆迎次王指塔下一犬問大衆云不得目爲犬道句看衆無語王云常住的

一日月夜延僧茶話次一僧問云如何是靜極光通達王云今日合昨日看

僧問無明識性即佛性之說如何理會王云此意有兩說無明譬波佛性譬水不可言波非是水不可言水全是波凡情認波捨水聖見取水棄波皆非真如佛性所以圓覺經云於諸妄心亦不息滅又云住妄想境不加了知金剛經云如如不動如如者如波不動者如水若了徹之人無明識性即佛性未了徹之人無明識性非佛性

叅學之人不遇明師指引若但認以揚眉
瞬目動轉施爲將昭靈靈謂自真性是
則認賊爲子不但辜負已靈抑且謗經誣
法學者當窮究徹底不可被古今未達向
上之盲眼宗師不了義論中止自悞也僧
稽首歎服

一日王云三冬滴水滴凍且喜春融冰泮
諸人看看池內龜生毛也未

一侍從問如何是鬼王云糊塗人云如何
是神王云明白人云如何是佛王云不明
白不糊塗人云如何是人王云一任揀擇
有僧問天得一以清地得一以寧君王得
一坐致太平衲僧得一如何王云清寧太
平僧禮謝王云爭奈你不是衲僧云爲何
不是王云因閣黎未得一在云誰是衲僧

卷十

十八

王云圓明是衲僧云恁麼則王爺得一也
王云我却不是衲僧云王何前後互異王
以左手拍膝云衲僧復以右手拍膝云衲
僧

有僧問如何是自性本不生滅王云因常
生滅所以說不生滅云如何是本不動搖
王云因時動搖所以說不動搖云如何是
本自具足王云因無一物可得所以說具
足云如何是能生萬法王云因無一法可
見所以說能生萬法云王言與祖說大相
違背王云若不違背即有趣向云如何生
無所住心王云入林動草八水與波僧無
語王云還須違背始得
有僧問如何是十智同真王云浮山九帶
八辯見七徵心六波羅蜜五位君臣四料

揀三玄要二賓主一句總答汝了也云葛藤則且置設如有箇纖塵不立底王爺又如何接王云一任門外聽請說云塵塵剝剝露全身阿誰分上事王云阿誰無分云恁麼則王爺分半座與貧衲始得王云闍黎要還俗耶云王爺亦不得出家王云可惜棒不在手云何不領話王云向誰討保僧作禮王云雖則如是須知更有在僧拂袖便行王喚云大德記取圓明此語好問一僧云將虛空填實將實地撮空向甚處出氣立脚僧云求生不得求死不得王云恁麼則了生死耶離生死耶云待填實虛空撮空實地還許通箇消息也無王云消息即不無還我填撮伎倆始得云非人撲地倒騎牛王云也是木女石即唱合歡

云若然文不加點也王云幸爾還有一點在云且喜流通

王沐浴索茶飲次問從者云身內是水身外是水汝看我身是水也不者云王身豈可言水王云人身原是四大合成汝可信得及否云信得及王云可又來汝細思之火見水自然滅土見水自然沉風見水自然浮其餘現今與水相合底此身非水而何者云雖然如是說理上行不得王笑云你既不知理却如何向汝談道

王問一僧云不張弓不鳴絃箭箭中紅心是阿誰伎倆僧云藍田射石虎須待李將軍王云莫謗李廣好云還是大功不宰是無爲而治王云圓明生平不辜負人云若然空谷應響也王云者掠虛漢云恁麼則

洪鐘在架也王云者敲磬漢云如何即得
王云啐啄同時失云爭奈作家不啐啄王
云還我話頭來云貧衲不是作家王云轉
見轉見云與王爺平分始得王云一任效
學

有僧問如何是大海無魚王云大地還見
有衆生麼云大富無糧又作麼生王云闍
黎吃飯還咬着米粒那云大悟無道又如
何說王云情知你我未曾大悟云王爺何
得以已方人王云却被闍黎帶累云心不
負人面無慚色王云吾嘗於此切云恁麼
則與王爺一鼻孔出氣也王自指鼻云且
道圓明那一鼻孔通那一鼻孔塞云無暇
分疎王云若然未許闍黎一鼻孔出氣在
一日風有僧問風聲來耳耳聞到風王云

第十

二十

白鶴喚空石人側耳云小僧不會王云有
聲無聞云有聲無聞意旨如何王云有我
故有聲無我故無聞云恁麼則任自聲也
王云大似土牛木馬云若然則我聲也王
云拾人涕唾漢云會也會也王云會處道
來看云有口的的道不出王笑云許汝識
得一星星

僧問阿難云世尊大開慈悲令我得入請
問如何入王云芥納須彌易須彌納芥難
云恁麼則倒騎青牛去也王云雖是知恁
麼去還應知恁麼來云如何恁麼來王云
芥納須彌云還假功勳也不王云若假功
勳去來皆幻云如何行履王云但盡今時
自然成立云立後如何王云密在汝邊僧
禮謝王云切忌將此數句留在胸中云貧

第十

二十

納不肯辜負王云珍重

有儒士問曹溪一派則且置五家宗旨請
王宣示王云圓明但知曹溪旨不解五家
宗士云一旨五宗是同是別王云遇正則
同遇邪則別云曹溪一派之旨如何王云
不取不捨云不取不捨個什麼王云不取
妙明不捨明妙云如何行履王云惺惺着
云如何脩證王云脩證則不無染汚即不
得云向上還有事也無王云有云如何趨
向王云佛言不可說于聖豈能宣云恁麼
則不可得而聞也王云證者自知非可測
士禮謝

王執扇問一僧云若道心內物缺半邊若
道物內心缺半邊若道在心內外缺半邊
若道不在心內外缺半邊且道如何得圓

成去僧笑而不荅王云試一一問圓明看
問云物在心內耶王云在心內云心在物
內耶王云在物內云物在心內外耶王云
在心內外云不在心內外耶王云不在心
內外云恁麼則四邊俱缺矣王云圓成已
竟還少欠箇什麼僧歎服禮謝王笑云也
只道得一半

閑言說

遍界無藏覆不掛一絲頭隨緣閒飲啄悠
然任自由

不識路

卷十

三

山自高兮水自清乾坤物我大分明偶然
忘却來時路偏向他人行處行

夜步

月上池魚吞餌風來竹影掃塵此際頓忘

物我渾然一派天真

懶夫我慢

一覺醒來睜眼處滿牕紅日天將午抖擻
精神着力看佛法世法誰來忤

易難

善惡之報如影隨形不造罪福出平入平

寫真

有人有我渾然幻無我無人非是真獨坐
有時山夜冷朝廷清淨一王身

空色

空兮色兮色空非空色兮空兮空色非色
空色是空色空是色空色云何空空色色

自然而然

身應王位為名繫心向空門又法縛兩頭
擔子齊拈也早是秦時舊轆轤

半十

三

小園三字經

圓明園真妙好如佛地同仙島青山環綠
水抱鶴銜芝魚吞藻有交黎多火棗種桑
蘇植秔稻閱六經禮三寶任春秋隨挽早
不拘束無煩惱奉天時養吾老

自得

有甚千年與萬春朝朝暮暮好光陰一物
喚來皆不中逢場作戲樂天真

人生

浮生如夢幻夢幻即長生長生離夢幻便
是野狐精

實話

誰言世事等浮雲捨此何方更覓真莫道
無人解句意賴他露柱作知音

自述

暮歸朝出也尋常玉兔金烏一任忙四海
浪平無個事憑將一句祝吾皇

閑

草堂空寂寂簷鵲演摩訶晝永閑無事渾
忘歲月過

錯錯

十八木珠一串穿終朝念佛滌心愆可憐
不識彌陀旨數盡恒沙也枉然

解脫

悟是迷根修為法縛不悟不修歲月耽擱
何計度生對病設藥海上奇方一服病却
平地金仙百億化身不悟不修名解脫人

笑話

難明此事是何因到底皆緣信不真一切
圖維齊放下氣灰豆爆笑當人

竹

數莖翠竹移自幽谷亭亭拂雲青青覆屋
何以名之本來面目

念珠

百八心珠顆顆圓癡人悞作手中禪其間
妙義無多子佛尾佛頭一串穿

扇

玉骨冰肌得自由山川人物半輪收放開
捏聚渾閑事一度風生一度秋

真經

卷十

二十四

說經萬八千未曾道一語欲識西來意香
爐與柱礎

鼻烟壺

全體琉璃靜發光頂門具眼豈尋常等閑
喚破其中味誰道壺中日月長

止兒啼

人我生是非是非生憎愛憎愛心一生萬
有為對待寡豈能敵眾處處成滯礙何如
渾物我悠然得自在

紙

冰肌素質無瑕垢一任東君自剪裁果十饒他
玉簡金經出若個不登寶筏來

露

出入同門形影莫喻無量劫來不離寸步
愚者自瞞對面不晤一朝打破廓然獨露

釋迦文佛

大慈悲父大醫王演說眾生療病方砒霜
翻作醍醐用笑煞堦前石敢當

觀音大士

三十二應露全身拯救眾生渡苦津只此

慈悲心太切却將覺海作紅塵

六句

聞不是耳見不是眼但可轉物莫被物轉
非垢非淨無增無減

示人

佛與眾生差別處只於覺識轉移間回頭
直下之成也乎者從教一串穿

警世俗句

笑凡夫何太愚珍糞土棄寶珠甘五濁樂
三塗忘生死逐有無蓬舞風葉泛湖堪憐
愍可嗟吁當警醒莫踟躕誠省已自識吾
只彈指一斯須超彼岸踏仙衢真活計實
良圖休遲疑莫含糊千聖轍萬佛途明指
示莫負辜

不二

佛生相隔多少祇在一念之間失之毫釐
千里得來沙界眉端

偶成

紅塵覺海原無隔堪笑衆生眼自瞞莫謂
毫端全攝去者毫更是障知端

舉十

三六

塵心

身是心中物心是身中神法界亦若爾塵
空兮空塵

石女曲

佛祖無言徹底宣幾人能不錯流傳當時
古德曾經道却是虛空舉得圓

愛山居

誰是山中人渠是山中叟有人來訪問渠
便大開口

木人歌雪

即心即佛是非是非佛非心非非試把
是非皆坐斷管他心佛作何依

實相頌

云何名實相湛湛與堂堂虛空有隕墜真
體無戕傷此共天天久此同地地長保經

八萬劫終不落空亡

擬金丹

金丹一粒水銀團光射三千星斗寒恰似
碧潭秋月影清清真湛徹層巒

聞鐘聲

舉十

三七

一聲萬籟寂萬籟一聲鳴不是知音者徒
勞側耳聽

懺修

心從何起將心懺懺得心空罪福空修幻
修兮行幻行上天下地自從容

無理之談

鐵舟泛巨海泥牛踏太空個中真意味料
得幾人同

中秋

真空世界中秋月旋碾清霄無障遮盤古
至今明此夜何曾有意照天涯

燒香

我香我焚我煙我聞香聞合一我我誰分

物我

情愛空閑閑空裏性耽山水水中謾言

魚鳥非相識且共升沉上下同

月中兔

我家有一物大似月中兔遇霞便餐霞逢
霧便吐霧或時躍天衢或時步雲路玉毫
現三千眼光射四部不染亦不貪無喜亦

無怒升沉同古今往來任朝暮悠悠度歲
華長生不拘數

自在

明明洞洞絕塵纖露露堂堂遍大千妙諦
不言空與色人間天上任安然

白猿捉月圖

老猿閑不住頻捉水中月因迷月體無狂
心不肯歇

淨土

一念不生此淨土直心前往彼西天内丹

成了外丹就三字拈來豎作川天

真心詠

皎潔虛明空界寂青山綠水意分明秋來
春去渾閑事月印寒潭一色清

合頭語

明頭明明合暗頭暗暗合色頭色色合空
頭空空合明此四和合是名一相合一相
無和合一一一和合

俗談

葛藤亘古自如如萬別千差總一渠識得
箇中非物我縱橫自在任收舒

誰說

渠本自無生何處窮渠滅塵塵露其體剎
剎演其說五蘊當下空三毒霎時歇湛湛
碧天清浩劫一輪月

遣懷

昨自神洲遊北溟今從天竺到臺山雖然
行脚癡狂客却是乘空一地仙

徹論

動靜原一體是非無二心不空亦不有無

年十

无

古亦無今

魔說

我佛道無生我却道有生如來說不滅我
却說有滅若不如是說不得大休歇

說夢

甲子週流年復年幾番滄海變桑田翻雲
覆雨渾閑事誰解壺中別有天

行脚

東西十萬里南北八千程會得脚根下移
來一步行

引鏡

你是我兮我是你你我對面不相識二人
合眼細商量一片青銅一飯器

答起滅

起從何處起滅向何處滅如念亦如風何

處可把捉起滅既若爾生死亦如說法界
亦同然空不空無別但了取捨心洞然自
明白任運兮如如悠悠兮萬劫

不是躲根

無相光中藏日月驢胎馬腹作生涯山河

大地渾閑事錦被蒙頭是處家

心體

明者明其心見者見其體見性明心體明
心見性理理體無回互心性無比擬歷歷
與明明如斯而已矣

指路

煙水雲山千萬疊就中一路坦然平世間
多少探竒客妄覓鵬程鳥道行

對月談心

不是惺惺不是癡箇中滋味幾人知試看

秋夜搏空月湛湛清光誰可移

書齋述心

風花雪月天真佛几簞琴書迦葉身不是
懶於拈妙句只緣無處覓詩心

一物頌

身中有一物時時身外安或同鸞鶴清霄
裏或共蟲魚山水間不動不定無往無還
飛潛任其所以出沒聽其如然極樂界自
在天彌勒後威音前不得號佛強名曰仙

西江月

乘片時之興率成一十六首
書罷不覺擲筆大笑

其一

海底泥牛聲寂掛樹石羊沒踪三千破衲
擁晴空却惹非人出夢一耳覩鐵驢拽磨
目聽木馬嘶風銅蛇鑽入石稜中兔角龜
毛廝共

其二

大道非三非一凡夫說一說三終朝捏怪
曰叅禪此句何嘗夢見 此句却非此句
此句不出一三高低普應霎時間一月千
潭徧現

其三

卷十

五

遍界如來妙體萬象隱顯其中乾坤物我
本來同莫作經文空誦 會得千途一轍
不會六道縱橫如如若若自從容豈費纖
毫功用

其四

煙水雲山疊疊浩浩萬里前程默移寸步
自分明大千須臾坐定 從他寒來暑往
誰云地濁天清笑看日月任西東一曲無
聲三弄

其五

八風吹來不動還同柳絮揚花箇中妙理
實堪誇不是脫空說話 會得途中受用
不會屋裏波查分明直截報君家不必別
探竒法

其六

春夏秋冬四序覆載高厚乾坤就中一物
太慇懃處處皆有渠分 視之却又不見
聽之更復無音欲識此物名和身塞耳合
睛相認

其七

鼻舌身意眼耳香味觸法色聲但不對待
便靈通翻成六般神用 凡情聖見無二
佛性即是無明幻化空身妙體成何止三
十二應

其八

佛性戒珠心印廓週沙界沒垠塵刹刹
滿圓身拆合不離方寸 識得無形妙體
如來寶藏奇珍但棄生滅守常真根塵自
然脫盡

其九

空空空今色色色色色色今空空色空通塞
本來同隱顯測其定動 動動動今定定
定動豈假施功榮枯得失聽天公自在彌
陀淨境

其十

霧鎖長江浩瀚雲封華嶽氤氳雲時風捲
霧雲分山水依然遠近 濁浪攪為酥酪
大千變作黃金不須卜度妄勞心雲霧從
他為暈

其十

其十二

其十一

一二三四五六六一二五三四三芥納須彌
自等閑說甚顛倒互換 不是神通妙用
亦非法爾如然石人鼻孔垂唇邊誰道
條白練

其十二

善惡種瓜種豆收來亦屬空花何如自種
野人家心田一粒無價 此粒非空非有
大千隨處生芽根深蒂固遍天涯道子難
描難畫

其十三

十方世界法體名曰如來化身不須斷妄
莫求真即在目前切近 取之轉迷轉遠
捨之愈沉愈深的實妙訣在無心歷歷明
明普印

其十四

石火電光歲月急忙下手猶遲光陰荏苒
幾多時刹那疾如彈指 心田離此即此
迷途百轍千岐茫茫堪笑世人癡大似河
邊覓水

其十五

至道本離言語風雲月露成吟信手拈出
却無心聊寄閑情一哂 多少詞壇詩社
刻畫爭欲驚人平頭合掌各詳論總被文
魔牽引

其十六

西江月詞數首堪笑不諳宮商參差韻調
欠鏗鏘大似無聲演唱 乘興豈知工拙
推敲不費思量游戲三昧偶逢場腔板原
來一樣

教外別傳不立語言文字如何是三寶大
地是佛虛空是法衆生是僧如威音前彌
勒後之說世尊若不指出我輩何以得聞
凡似此皆從緣所知非自真見但了目前
虛空自然會豎窮三際但了目前片地自
然會得橫徧十方三寶一體大道只在目
前不必向高遠奇妙會實不用一句語言
文字如是叅

御選語錄卷第二十

音釋

啐啄 上七醉切音翠 喂 於非切 戕 音牆 暈 音
下音捉哺穀也 切